

Saopćenje za javnost

Prva javna debata u ciklusu javnih debata „Jako civilno društvo: Za i Protiv“: „Zašto NVO sektor šuti?“

U Sarajevu je 10.7.2012. godine održana javna debata „Zašto NVO sektor šuti?“. Uvodničar je bio Nebojša Šavija Valha.

Već sama postavka teze je izazvala oprečne stavove i otvorila pitanja kao što su: Da li je tezu postavio neko ko nikada nije bio u NVO sektoru? Odakle ideja da NVO sektor šuti? Da li se ovako postavljenom tezom derogira rad mnogih NVO? Šta bi bilo sa BiH da u zadnjih 15 godina nije bilo NVO?...

Otvorene su i dileme da li i koje NVO šute? Koliki broj NVO ima u BiH? I ukoliko zaista postoji 12.000 takvih organizacija da li taj broj devalvira rad posvećenih NVO-a? Činjenica je da u BiH postoji ih 12.000 dovodi do pretpostavke da je bh. društvo profitiralo kao i ostala razvijena društva u smislu jake svijesti o ulozi civilnog društva za jednu zemlju.

Stavovi koji ne dozvoljavaju propitivanje tišine NVO sektora otupljuju oštricu misije samog NVO sektora, bio je jedan od stavova, ali podjednako su se čuli i stavovi:

NVO sektor ne može u cijelosti djelovati politički.

NVO postaje kao naši političari ljekari opće prakse koji u službi pisanja projekata svaštare.

NVO sektor ne šuti, ali nema dovoljno jak glas.

NVO šuti, betonirano šuti.

NVO sektor je akter bh. apokalipse u kojemu vlada potpuna šutnja.

NVO sektor ne šuti nego radi i za taj rad mu nije neophodan novac nego suradnja sa vlašću.

BiH nema ni intelektualaca ni građanstva, pa tako nema ni jak NVO sektor, a da bi taj sektor bio jak mora se naći najmanji zajednički sadržilac za sve .

NVO sektor šuti jer: nema šta reći; ne zna kako doći do medija; zato što neke NVO lažno prijavljuju broj ljudi sa kojima rade i na koje se njihovi projekti odnose; mali broj aktera civilnog društva je spreman da javno digne svoj glas, da se javno konfrontira aktualnoj vlasti; postoji netrpeljivost među NVO-ima; brojne mreže ne funkcioniraju; NVO ne dijele informacije.

Također neki od iznesenih stavova su bili: Devalviran je stav da su NVO korektor vlasti. Javno iznošenje kritika onemogućava daljnje javno oglašavanje zato što su javni emiteri u ulozi partija a ne građana

Neki od učesnika debate su govorili i o aktualnim problemima NVO koju predstavljaju, ali i iznosili prijedloge za peticije koje se odnose na sasvim druga društvena pitanja.

Tokom debate kristalizirana je i sljedeća tema debate: „Učešće NVO sektora u političkim procesima“